



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

18. Kalenderwoche – ab 01. Mai 2011

Erschdor Mai am Sonndach

Nascha, das is heidzudaache ziehmlich egahl - isch meene, ob dor erschde Mai e Sonndach is. Es dud ja eh keenor mähr hingehn!

Abor friehor hammor uns da geärschord. Sonndachs had mor ja schließlich was annersch vorgehabd, als wie Demongschdradsjohn un Fähnschn schwenkn vor dor Dribiehne! Grade, wenn de Kleengärdnor warsd! Un een kleen Gardn hadde ja fasd jedor! Mid Laube un Grillderasse! Kleengärdnor sein, das kam ja vor Bedriebsdiregdor sein! Erschd dor Gardn, dann de Laube! Dor Betrieb dad dann irschendwo nach Garasche, Audo, Schwieschormuddor un Balkong rangschiern.

Nee, kleene Gärdn sin nisch mähr so in Mode. De Leide dun wahrscheinlich mähr so draußn rumgudschiern... mid de Audos... in dor Gäschend... weil ehm das Bennzien viel billischor is, als wie de Gardnbachd. Odor wesweeschn sonsd?

Weil se bloß noch alle ihrn Jobb im Kobb ham? Kann ooch sein. Dor Jobb had uns dazumals nisch so indressierd - dähn hammor ja gehabd!

Odor sin de Kleengärdn im Niedorgang, weils immor wenischer Familjen gähm dud? Das kennde sein - e Gardn is was fiehr Familjen! Singl-Gärdn sin seldn!

Jednfalls - dazumals hasde Sonndachs im Mai was zu dun gehabd im Gardn! Da is dor Gambfdaach dor Wergdädischn nisch so begeisdord gefeiord wordn, wie wennor off eim Mondaach odor een annorn Wochndaach gefalln war. Wenn dor erschde Mai zum Beischbiel off eim Donnersdaach

gefalln war, da had bei dor Demonschdradsjohn kaum eenor gefähld. Ja, da is de Belegschaft von unsorm volkseischnen Betrieb fast hunnordbrozendisch dabei gewähns! Un es is ooch immor scheen gewähns - wenn scheenes Weddor war! Bei Reeschn isses nisch ganz so scheen gewähns. Wobei... wemmor an dor Dribiehne vorbei warn, had dor Reeschn nisch mähr so sähr geschdeerd. Meisdens ham mir dann so als Belegschaft in dor "Gudn Gwelle" Einzuch gehaldn - un de Schdellung dord lange gehaldn! Un immor hoch de Dassn - offs Wohl dor Arbeidorklasse in dor ganzn Weld! Un de Weld is groß! Da had mor zu dun!

Un wensch nu so ieborleesche... außor dor öborschn Heeresschbidze, was dor Betriebsleidor un dor ersche Bardeisegredähr war... alle annorn ham da midgezochn! Ja, dor gesamde Wassorkobb war dabei. Dor zweede Bardeisegredähr, de Gewärgschafdsleitung, de FDJ, de DSF, de Golleschn vom Neuororwesn, die von Gulduhr un Schbord, de Forschung, de Lohnbuchhaltung, de Gambfdrubbe, de Eggonomie... - ja, mir aus dor Brodugsjohn warn immor in dor dodahlen Mindorheid! Abor am Gambfdaach dor Wergdädischn sin ehm große Deele dor nischbrodugdiefn Wergdädsichn mid uns solidarisch gewähns. Ja, da hammor zusamm in dor "Gudn Gwelle" gesessn, e Bierschn gedrunkn, un dähn Schdaad - mid Erisch an dor Schbidze! - een gudn Mann sein lassn! Ährlisch... - war immor scheen, wenn nisch grade Sonndaach war!

Eduard Sachsenmeyer